



Extrait de la revue **SingularS** du 1^{er} trimestre 2014

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

Rubrique : Rizêye

Po on cadô, ç' a stî on cadô !

Ol grosse cinse do viadje, " Li cinse d'ol majîe " come dijèt lès djins d'avôr-ci, lès mèssees sont fwårt midones. Po l' tombola d'ol sicole libe, nos donrans come lot, on ptit cossè.

Vla ki l' djoû dol tombola, on cope, nin sins rin, mès nin cinsî po deûs sous, gangne li cossè !

- Vèrni ! Li djâle tchît todi su l' gros moncê ! Paye on vinre !

- Marîe, one toûrnéye po tot l' monde, al tôve do fond !

Vla l' cossè ol propriété d' nos djins. On-z-astoke cwate palètes èsson.ne èt vla nosse cossè ki pout fougner a st-ôje ol peloûze. Il èst bin sognè tos lès matins pa l' fème ki trouve ki c' è-st-on ôji moyin po s' disfè dès rêsses di cûjène !

Èt vla l' cossè ki d'vint gros, crôs, il èst bon a touwè.

- On n'ol va nin cand-minme touwè ! Di-st-èle li fème !

- Cwè fè ?

- C' è-st-one trôye, fèz-lî fè dès djon.nes ! Di-st-i l' vèjin.

- Kimint-c' k' i fôt fè ?

- Minez-l' a vèra al cinse d'ol majîe ! Ci n' èst k' a kékes cints mètes did ci ! Dji sés bin bin k' ça monte one miète reûd, mès vos sèrèz mî dins lès vûzions d' vosse fème èt ça, ça compte !

- Dji n' è pont d' rododo.

- Purdez vosse bèrwète èt l' minez jusk' a rla.

Noste ome aboute li trôye ol bèrwète èt, tot tanflant come on boû, gangne li cinse d'ol majîe.

- Âh ! Vos vnéz po l' vèra ? C' èst dij eûros !

- Èle sèrè plin.ne ?

- Aléz savèr ! Ça c' èst l' majîe ! Si dmwin matin, èlle èst co o batch di freûde êwe, c' èst k' èle vèrote co èt k' èle n' èst nin plin.ne. Vos n' avez k' a rivnu èt vos donrez 10 euros.

Li londwin matin, raf, èle èst co o batch ! Co one souwéye èt dij euros !

- Èle sèrè plin.ne ?

- Majîe ! Pèrson.ne ni pout dîre ây ou nèni. Si c' èst non, vos n' avez k' a rivnu èt ça sèrè 10 euros.

Li treûzinme djoû fin parèy. Fô-st-assoti ! Ça kmince a bin fè !

Li cwatrinme djoû :

- Marîe, wêtez on pô c' ki nosse trôye fèt ! K' èle ni sôye nin co è s' batch Sègneûr Jésus !!!

Marîe s' lève èt bôk'téye al finèsse, èt s' fout a rîre.

- Marîe ? Èle n'èst nin co o batch ?

- Hi, hi, hi...

- Marîe ? Èle n' èst nin co o batch ?

- Nèni... Hi, hi, hi...

- Marîe, rapôchtéve-vos ! K' è-c' k' i gn-a ? Ôh vèrole, dijez-m' cwè !

- Hi, hi, hi,... Èlle èst dja ol bèrwète !

Joseph BILY (Nassogne)